

Fimmtudaginn 3. júlí 1997.

Nr. 278/1997.

Ákærvaldið

(Björn Helgason saksóknari)
gegn

Sigurbirni Gunnari Utley

(Sigurður Georgsson hrl.)

Kærumál. Gæsluvarðhald, c-liður 1. mgr. og 2. mgr. 103. gr. laga nr. 19/1991.

Dómur Hæstaréttar.

Mál þetta dæma hæstaréttardómararnir Haraldur Henrysson, Arnljótur Björnsson og Guðrún Erlendsdóttir.

Ríkissaksóknari skaut málinu til Hæstaréttar með kæru 27. júní 1997, sem barst Hæstarétti 30. sama mánaðar, og krefst hann þess, að hinum kærða úrskurði verði hrundið og gæsluvarðhald varnaraðila, sem rann út föstudaginn 27. júní sl., verði framlengt, þar til dómur verður kveðinn upp í máli ákærvaldsins gegn honum, sem höfðað var með ákæru 24. júní 1997, þó eigi lengur en til föstudagsins 8. ágúst 1997 kl. 16.00. Styður ákærvaldið kröfu sína c-lið 1. mgr. og 2. mgr. 103. gr. laga nr. 19/1991 um meðferð opinberra mála.

Varnaraðili krefst staðfestingar hins kærða úrskurðar og kærumálskostnaðar.

Með ákæru ríkissaksóknara 24. júní sl. var höfðað mál á hendur varnaraðila fyrir að hafa ásamt öðrum manni ráðist að starfsmanni Vöruveltunnar hf. í húsinu nr. 48 við Suðurlandsbraut í Reykjavík 14. apríl 1997 með lambhúshettu á höfði og vopnaður barefli úr leðri, fylltu með sandi, og barið hann með því og rænt af honum plastpoka með miklu fé, eins og nánar er rakið í hinum kærða úrskurði. Er atferlið í ákæru talið varða við 252. gr. almennra hegningarlaga nr. 19/1940.

Svo sem fram kemur í hinum kærða úrskurði, á varnaraðili mikinn afbrotaferil að baki. Hann er nú undir rökstuddum grun um atferli, sem varðað getur allt að tíu ára fangelsi. Þegar til þessa er litið, þykir skilyrðum c-liðar 1. mgr. og 2. mgr. 103. gr. laga nr. 19/1991 vera fullnægt. Verður krafa ákærvaldsins um gæsluvarðhald því tekin til greina.

Varnaraðili, Sigurbjörn Gunnar Utley, sæti gæsluvarðhaldi, þar til dómur gengur í máli hans samkvæmt ákæru 24. júní 1997, þó eigi lengur en til föstudagsins 8. ágúst 1997 kl. 16.00.

Úrskurður Héraðsdóms Reykjavíkur 27. júní 1997.

Ríkissaksóknari hefur krafist þess, að Sigurbirni Gunnari Utley, kt. 250764-3679, Hamrabergi 16, Reykjavík, verði gert að sæta áfram gæsluvarðhaldi frá kl. 16.00 í dag, föstudaginn 27. júní, þar til dómur gengur í máli ákæruvaldsins gegn honum, Ólafi Kristjánssyni og Jóni Kristjáni Jacobsen, þó ekki lengur en til föstudagsins 8. ágúst 1997 kl. 16.00.

Með ákæru, dags. 24. júní, var höfðað opinbert mál á hendur ofangreindum þremur mönnum. Þar er þeim gefið að sök brot gegn 252. gr. almennra hegningarlaga, sem lýst er svo:

„ . . . fyrir rán með því að hafa í sameiningu og eftir fyrir fram gerðri áætlun staðið að ráni á 2.320.740 kr. í reiðufé, 175.125 kr. í ávisunum auk rafrænna færslna, 4.138.811 kr., með því að ákærðu Ólafur og Sigurbjörn Gunnar, báðir með lambhúshettur á höfði til að hylja andlit sín og vopnaðir heimagerðum bareflum úr leðri, fylltum sandi, réðust um kl. 9.00 að morgni mánudagsins 14. apríl 1997 að starfsmanni Vöruveltunnar hf., Finni Eðvarð Egilssyni, kt. 280271-5199, þar sem hann var að koma upp stiga hússins að Suðurlandsbraut 48, Reykjavík, á leið sinni á skrifstofu fyrirtækisins á 3. hæð með uppgjör verslunarinnar 10-11 í Glæsibæ fyrir dagana 11.–13. apríl 1997 í plastpoka, en ákærðu, sem biðu í ræstingakompu á 3. hæð hússins, komu á móti Finni, sem hörfaði niður stigann, en ákærði Sigurbjörn sló til Finns, svo að hann féll á stigapallinn, og við það náði ákærði Ólafur peningapokanum af honum og hljóp með hann út, en ákærði Sigurbjörn barði Finn nokkrum sinnum, þar sem hann lá, m. a. í höfuð og brjóst, með áður nefndu barefli, áður en hann hljóp út. . . .“

Sakamál þetta var þingfest í gær, og hefur ákærði, Sigurbjörn, játað sakargiftir í meginatriðum. Hann hefur setið í gæsluvarðhaldi frá 15. apríl sl.

Ákæruvald styður kröfu sína um framlengingu gæsluvarðhalds c-lið 1. mgr. og 2. mgr. 103. gr. laga nr. 19/1991.

Verjandi ákærða mótmælir framlengingu. Gæsluvarðhald sé óþarft og ónaðsynlegt og því ekki fullnægt lagaskilyrðum til beitingar þess.

Niðurstaða.

Ákærði, Sigurbjörn Gunnar Utley, er ákærður fyrir þátttöku í broti gegn 252. gr. almennra hegningarlaga og hefur játað aðild sína að því í megin-

atriðum. Rannsóknarhagsmunir standa ekki til þess, að hann sæti varðhaldi, og á því er ekki byggt.

Af hálfu ákærvalds eru ekki skýrlega reifuð atriði, er um er fjallað í c-lið 1. mgr. 103. gr. laga nr. 19/1991. Ákærði hefur hlotið mjög marga refsisdóma frá árinu 1982, hinn síðasta í nóvember 1995, en ekki er skýrt frá öðrum brotum, sem hann er grunaður um að hafa framið á þessu ári. Þótt ákærði sé vanaafbrotamaður, verður framlenging gæsluvarðhalds ekki reist nú á c-lið 1. mgr.

Brot gegn 252. gr. almennra hegningarlaga getur varðað allt að tíu ára fangelsi. Er því fullnægt fyrra skilyrði 2. mgr. 103. gr. laga nr. 19/1991. Forðæmi finnast hins vegar ekki fyrir beitingu gæsluvarðhalds skv. 2. mgr., þegar brot er talið varða við 252. gr. Þá sýnast almannahagsmunir ekki standa til þess, að gæsluvarðhald ákærða, Sigurbjörns, verði framlengt enn.

Kröfu ákærvalds um framlengingu verður samkvæmt framansögðu hafnað.

Ú r s k u r ð a r o r ð:

Hafnað er kröfu ákærvalds um framlengingu gæsluvarðhaldsvistar ákærða, Sigurbjörns Gunnars Utley.
